

Biar semangat memberi jadi warisan



DULU TERIMA, KINI PULANGKAN SEMULA: Cik Nadia Ahmad Samdin kini giat membantu golongan remaja berisiko yang ramai daripada mereka mempunyai masalah kewangan keluarga. Beliau dahulu pernah menerima bantuan kewangan dan dermasiswa ketika di sekolah menengah dan universiti. – Foto CFS

► **NUR FATHIN AWALLUDIN**
nfathin@sph.com.sg

SEMASA pandemik Sars pada 2003, bapa Cik Nadia Ahmad Samdin disuruh mengambil persaraan awal daripada kerjayanya dalam industri penerbangan.

Sebagai satu-satunya pencari nafkah dengan dua anak yang masih bersekolah ketika itu, keluarganya menghadapi kesempitan kewangan.

Cik Nadia dan dan adik lelakinya yang masing-masing ketika itu berusia 13 tahun dan lapan tahun menerima bantuan kewangan bagi persekolahan mereka.

“Ketika di sekolah menengah CHIJ Katong Convent dulu, saya menerima bantuan kewangan.

“Saya ingat lagi bagi GCE Peringkat ‘A’ pun saya telah ke pejabat sekolah dan saya lihat kos yang perlu dibayar, ketika itu saya sungguh bersyukur kerana ada orang yang membantu saya untuk bayar kos ini.

“Bagi tahun pertama (di universiti) saya terima Dermasiswa Undang-Undang SMU, yang membantu peralihan saya ke universiti. Bagi saya, menerima bantuan kewangan ketika itu merupakan satu keperluan,” ujar beliau, yang merupakan alumni Universiti Pengurusan Singapura (SMU).

Selain mengajar tuisyen separuh masa kepada sehingga lapan murid ketika di universiti, beliau juga kadang kala menjadi pembawa acara untuk mendapatkan wang tambahan dan membeli bahan-bahan dapur di rumah.

Kini, walau sudah berjaya dalam kerjayanya sebagai peguam dan Anggota Parlimen, Cik Nadia, 30 tahun, tidak pernah lupa akan masa-masa sukar yang pernah dilaluinya itu.

Malah, beliau amat bersemangat melakukan usaha berkaitan membantu anak-anak muda berisiko dan keluarga mereka yang ramai di antaranya mengalami masalah kewangan.

Beliau merupakan antara duta kempen yang diberi nama ‘A Greater Gift’ yang dimulakan Yayasan Masyarakat Singapura (CFS), badan kebajikan yang menggalak sifat dermawan di sini.

Kempen tersebut bertujuan menggalak pemberian warisan atau *legacy giving*. Cik Nadia, yang sebelum ini pernah ber-



TABUR BAKTI: Cik Nadia semasa menjadi mahasiswi Universiti Pengurusan Singapura (SMU) merangkul seorang kanak-kanak ketika menjadi relawan di kampung terpencil di utara Thailand. – Foto-foto fail



ZAMAN SEKOLAH: Cik Nadia (kiri) bersama rakan dari Sekolah Menengah CHIJ Katong Convent pada acara merai Hari Keharmonian Kaum. Semasa menuntut di sana, Cik Nadia pernah menerima bantuan kewangan.

khidmat sebagai penasihat panel di Mahkamah Belia mendedahkan bahawa beliau juga sering bekerja rapat dengan anak-anak yang tinggal di flat sewa.

“Bagi saya, (kesukaran saya dahulu) ialah kesempitan kewangan, tetapi bagi ramai keluarga ini, ia bukan sahaja kesempitan kewangan malah juga kurang sokongan keluarga yang diberikan,” katanya.

Beliau dan seorang rakan memulakan program pendampingan (befriender) yang tidak formal di beberapa flat sewa di kawasan Yishun untuk mendekati remaja-remaja berisiko di sana.

Dua tahun kebelakangan, beliau turut ke penjara untuk mengadakan bengkel bagi beliau yang melalui latihan reformatif dan bertemu mereka setelah mereka dibebaskan untuk terus memberi bimbingan.

Selain itu, ketika berkhidmat dalam majlis Lembaga Biasiswa Kenangan Maulud (LBKM), Cik Nadia bersama-sama anggota lain turut memulakan dana The Top-Up Fund untuk menambah nilai kad EZ-Link pel-

PEMBERIAN WARISAN

Pemberian warisan atau *legacy giving* ialah sumbangan masa depan yang dirancang kepada badan-badan amal.

Pemberi boleh memberi dalam bentuk wang tunai, sekuriti yang boleh dipasarkan, pembayaran insurans, wang CPF dan aset yang boleh dipasarkan.

Sejauh ini, CFS telah menerima \$67 juta dalam pemberian warisan. Ia boleh memadankan minat pemberi kepada usaha yang berkaitan dengan minatnya.

Untuk maklumat lanjut, sila lungsur legacygiving.sg

ajar yang terdedah demi mengurangkan risiko ketidakhadiran jangka panjang.

Menggalakkan lebih ramai golongan muda untuk memikirkan tentang pemberian melampaui jangka hayat mereka, Cik Nadia berkata:

“Bagi generasi kami, ramai sudah pun memikirkan tentang kesan sosial, menghabiskan masa melakukan kerja sukarela, ini semua bukan perkara yang asing kerana di sekolah pun kami semua sudah terdedah kepada CIP (Program Penglibatan Masyarakat).

“Jadi, bagi saya, bagaimana kita dapat terus memberi melebihi jangka hayat kita kerana jika anda sudah sangat bersemangat dan aktif menyumbang terhadap suatu usaha itu semasa hidup, ia tidak sepatutnya hanya berakhir dengan tamatnya riwayat hidup anda.

“Pemberian warisan adalah tentang memikirkan perkara sedemikian,” ujar beliau.